

籌辦夷務始末

卷六十一之六十二

籌辦夷務始末卷之六十一

道光二十二年壬寅九月甲寅。

欽差大臣耆英參贊大臣齊慎奏。六月二十日。內閣奉

上諭。耆英齊慎奏鎮江勦擊情形各一摺。所有副都統海齡及府城文武官兵。現在作何下落。並此次傷亡弁兵。著耆英等迅即查明具奏等因。欽此。查京口副都統海齡殉難之處。節經查奏在案。其該城文武官員下落。經等派委數員前往查探。該城文武城陷之日。有受火箭傷之知事王興榮一名。傷之輕重。尚應咨查核辦。其餘並無傷亡人員。惟武職官員兵丁。傷亡過多。彼時府城失陷。即被逆夷入城盤踞。未能

隨即查明。等何敢含混覆奏。所有城內接仗之青州京口官兵。有當時逃出者。有在城內藏匿。十數日後始行逃出者。亦有被逆夷擄至船上者。其城內陣亡屍軀。無從辨認。嗣經潰散官兵招集漸多。互相查詢。始將目覩受傷陣亡官兵。陸續稟報。並由夷船送還兵丁。先後通計。查出青州滿營。陣亡兵五十五名。受傷官兵六十五員名。打仗未出。不知下落兵二十四名。京口滿營。陣亡官員兵丁一百七十員名。受傷官員兵丁一百六十一員名。無下落兵丁二十四名。鎮江綠營。陣亡兵三名。受傷弁兵六員名。無下落兵十七名。湖北綠營。陣亡弁兵七員名。受傷弁兵八員

名。無下落兵三名。四川綠營。陣亡兵三名。河南綠營。陣亡兵一名。受傷兵一名。江西綠營。受傷兵二十二名。除現在查明陣亡受傷員弁數目外。尚有受傷限內亡故。及傷之重輕。井不知下落員弁共八十八員名。應請責成該管將軍總督等。另行飭查明確。核實咨部辦理。

硃批。不愧朕之滿洲官兵。深堪憫惻。

耆英德珠布又奏。竊查京口失陷。副都統印信。經驍騎校祥雲擲於署內井中。才等派委明幹員弁。設法將印信於井內撈獲。其印現在。才德珠布衙門。暫行存貯。茲准兵部來文。京口副都統一缺。欽奉。

諭旨。簡放吳必瀉。欽此。查京口失散男婦老幼。有在丹陽常州一帶安插者。亦有就近在江甯安插者。當因喫夷占據京口。所有逃散兵丁男婦。隨處派員照管。令夷船退出。鎮江城內肅清。其在江甯丹陽常州一帶安插者。亟應令其仍歸原處駐防。惟城中現無大員。不足以資彈壓。相應請旨飭令新任副都統吳必瀉迅速到任。俾資管轄而重地方。

耆英又奏。六月二十四日。內閣奉

上諭。耆英奏查明鎮江城陷時。京口副都統海齡並其妻及次孫同時殉節。該副都統為國捐軀。忠義可嘉。著加恩照都統例賜卹等因。欽此。○又遵飭京口協領武忠阿等。派委妥幹員弁。將副

都統海齡及伊妻伊孫尸骸。在被焚處所尋獲。並於灰燼中。檢獲海齡原著葛紗袍襟。伊妻所帶玉環。海齡現存子女。亦一併查明下落。均送至丹陽縣。除將海齡現存子女。飭令妥為安插外。復札飭該縣金鎔。及京口協領武忠阿等。眼同海齡現存之子宜琛。泰。檢明尸骸。加結認領。並由軍需局先後酌給銀三百兩。以資殯殮。仍移咨江蘇撫臣程喬采。一俟軍務戡事。即將海齡等尸棺。同海齡現存子女。派委員弁。妥為照料。送交京旗。以慰忠魂。至驍騎校祥雲。現據該協領武忠阿等結報。祥雲於海齡殉難時。先將副都統印信。投入井中。旋亦投水自盡。其父馬甲長松業

已陣亡。其妻鄔琅罕濟勒們氏。慮遭污辱。將其二女刺死。
復自戕盡節。其母卜氏。懷抱該驍騎校幼子廷耀。投塘遇
救。現無下落等情。朱批。可嘉。可憐。查祥雲一門殉難。實堪憫惻。除應得卹

典。努力遵

旨咨部。加等賜卹。長松歸入陣亡兵丁案內議卹。並飭該管協領
佐領。訪查卜氏及廷耀下落。務期尋獲外。所有鄔琅罕濟
勒們氏。於城陷時慮遭污辱。手刃二女。捐軀明志。尤屬深
知大義。惟京口旗婦尚有捐軀者。應俟該將軍德珠布詳
加查明。一併咨部。

旌獎以慰貞魂。

耆英又奏。道光二十二年六月二十三日。奉

上諭。據德珠布奏。將常鎮道周頊原稟鈔錄呈覽。內稱鎮江於初八日閉城。城上開放槍礮。擊殺平民。指為漢奸。每日約殺十餘人。頗有冤枉。府庫銀兩。為都統所據。該府係其姻親。一切附和。妄行等語。著將原稟摘錄發給閱看。詳細訪查。是為至要。又於

七月初一日。奉

上諭。鎮江理事同知全興。於城陷之日。潛藏民家。旋即逃出。鎮江府知府祥麟。投水遇救。各情節。均著耆英詳查研訊。定擬具奏。又齊慎片。叅常鎮道周頊。託詞不知何往。亦著查明具奏。各等因。欽此。維時。鄂因江甯夷務喫緊。即於七月初三日。馳赴

應援。一面派委四等侍衛咸齡。太倉州知州徐家槐。在丹陽一帶。就近訪查訊辦。旋據該侍衛等訪查明確。並將常鎮道周頊。鎮江府知府祥麟。理事同知全興。傳集研訊。取具供稟。呈送前來。竊按款覆加確覈。如周頊原稟所稱。鎮江於初八日閉城。城上開放槍礮。擊殺平民。指為漢奸。每日約殺十餘人。頗有冤枉一節。據鎮江府知府祥麟供稱。前因夷船駛入京口。府城危急。經副都統海齡。於六月初八日。將城門關閉。督率弁兵。登陴據守。適有身著黑衣。狀類夷服者三人。由城下經過。當經守城兵丁。用火箭射倒一人。其二人即行逃去。城上並無施放槍礮。擊殺平民。至

該副都統在城內拏獲漢奸。均交理事同知全興訊供。分別辦理。並非一概誅殺等語。據全興供稱。旗營於閉門後。陸續摻獲漢奸一百餘名。均經該副都統於六月初十日。發交該同知訊問。內有一名。供係大佛庵僧人。令伊入城。探問兵數多寡。另有十二名。各帶軍器。跡涉可疑。其餘俱係平民。誤被拏獲。經該同知錄供。稟請副都統覆訊。該副都統飭令將十三人立即處斬。餘俱釋放。至十二三等日。每日拏獲漢奸。每起約二三名不等。經該同知訊明。均屬無辜。其住居城內者立予放歸。住居城外者即行縫出。統計前後所獲漢奸。除於初十日處斬十三名外。餘俱訊明。

省釋。委無每日約殺十餘人之事。又周頊原稟所稱。府庫銀兩。為都統所據。該府係其姍親。附和妄行一節。據該府祥麟供稱。府庫共存軍需銀五萬八千兩。旋於六月十二日。接准副都統照會。提取銀一萬兩。其四萬八千兩。仍存府庫。隨時支發。至該府胞妹。於本年二月。許字海齡次子為妻。尚未完娶。雖實係姍親。而公事公辦。從未附和妄行。惟據周頊續稟。該道於十一日。札提銀一萬兩。支發兵餉。當日並無回信。聞係副都統阻撓。迨經函託。始於十二日發銀五千兩。至該副都統性情偏執。如緊閉城門。妄拏無辜。該府不能正言力阻。即同附和等各等語。該侍衛等以軍

需既由府庫支放。何以該副都統提取銀一萬兩。該府於接准照會。何以不稟督撫。徑行發給。至該道札提銀一萬兩。何以遲至次日。僅發一半。難保無阻撓附和情弊。詰訊祥麟。據供副都統提銀一萬兩。已於照會內聲明。係為開仗後。加給兵丁口糧之用。事竣自行專摺奏銷。該府因軍情緊急。若俟稟明督撫。再行發給。往返需時。恐眾兵迫不及待。轉滋藉口。是以一面發銀。一面開摺通稟。詎料未及發申。城已失陷。至該道提銀札內。本有或一萬或五千之文。是以於十一日奉札時。即派衛守備耿國榮解送銀五千兩。又搭解丹徒縣請借兵差水腳銀二千兩。因是日時

已傍晚。該副都統未肯發給令箭。以致不能出城。至次日辰刻。始行解交。該副都統並無阻撓情事。其城門啟閉。例由副都統主政。該副都統以夷船停泊江面。郡城戒嚴。閉門固守。雖百姓不能遷徙避兵。未免缺望。而事屬正辦。該府豈能力爭。至查拏漢奸。為守城第一要務。雖先後盤獲形跡可疑一百餘人。而處斬者實止十三人。此外均已訊明釋放。辦理尚非過當。又奉

旨飭查鎮江府理事同知全興。於城陷之日。潛藏民家。旋即逃出。鎮江府知府祥麟。投水遇救各情節。訊據全興供稱。該同知於六月十四日。正在南門巡查。忽見火箭如雨。射入城

中。北門礮聲不絕。夷匪無數。業已登城。兵皆潰散。該同知欲行回署。路遇夷匪衝突。顛蹶在地。旋被家丁扶救。暫避民舍。至十六日。隨同民眾出城。又據祥麟供稱。該府於城陷時。先至縣學投入泮池。被百姓救起。送入學宮。該府復乘百姓散去後。潛在門楣上。用衣帶自縊。經門斗瞥見。喊同教諭阮師龍解救。適有家丁尋至。將其扶入民家。於十七日出城。至丹陽廟中調理。至二十一日。始漸平復等語。傳訊教諭阮師龍。所供解救祥麟自縊。及目覩該府衣服淋漓各情。慇懃如繪。又參贊大臣齊慎。片參常鎮道周頊。託詞不知何往一節。訊據周頊稟稱。該道於參贊到京口

時。僅止謁見一次。嗣即在都天廟辦理糧臺及地方公事。並未他往。且都天廟距參贊行營密邇。大眾往來。有目共覩。該道何能託詞逃避。至參贊帶來擡礮。先經丹徒縣雇夫運送安設。嗣據把總宋膺善以擡礮每桿用長夫四名。每名日支銀一錢二分。具文請領。因查江蘇軍需案內。並無此項章程。詢問浙江委員。亦未支過此款。是以未敢擅發。其兵丁口糧。向發折色。自六月初八日。夷船駛集。鋪戶閉歇。該道慮及兵食艱難。飭縣將城外倉米撥借應用。嗣因官兵並未請領。是以未經支給各等語。等覆查常鎮道周瑣。隨同叅贊大臣齊慎。辦理糧臺。訊係居住公所。並無

託詞逃避重情。其稟許各款。雖未盡實。均出有因。究由閉城後傳聞不一。探報未確所致。該道駐紮城外。與在城防守者。不無區別。惟究有地方之責。未便竟置之不議。恭查現奉

硃批某處可矣

諭旨。飭令各督撫查明失守各員。彙案嚴參。所有周頊一員。應請與城陷後兩次自盡。遇救得生之鎮江府知府祥麟。一併由該督撫彙同其餘失守各員。查明情罪輕重。分別參辦。理事同知全興潛匿民家。隨眾出城。雖現經查明。該同知係專理旗民交涉事件。並無地方之責。亦未便任其置身事外。應歸入查參失守各員案內。一併附參。

兩江總督牛鑑奏。本年六月。喫咭喇夷船抵省。先後調防湖北河南江西等省。及江甯旗營各兵。又本省外調防兵。共計七千六百數十名。所需薪水口糧。均分別照章支給。在案。茲仰荷

天恩。罷兵息民。

准令該夷通商。八月二十八日。夷船全數開行。城內外居民安堵。所有各路防兵。自應次第撤回。俾省供支而息勞勩。臣已札飭江甯鎮江揚州等府。轉飭各縣。雇備船隻來江。由遠而近。先從北防兵為始。分起間日行走。以免兵數眾多。同時裁撤。致有擁擠滋擾之虞。其應給口糧銀兩。即於撤防